



27. August 2026

Bentiarq Ottosen

Atassut

Inatsisartut Suleriaasianni § 37, imm. 1 naapertorlugu apeqqutit tullittut Naalakkersuisunut apeqqutigaakka:

1. Kangerlunni qalorsuorsorluni saarullinniarneq qaqugu Naalakkersuisut pilersaarutigaat unitsinneqassasoq?
2. Aqutsiveqarfimmi sinerissap tunngaviusumillu killeqarfimmit 3 sømilit akornanni angallatit 24 meterit a.t.t. imaluunniit 120 BT annerilluunniit aalisagqusaanngillat. Naalakkersuisut nalunaarummik iluarsartueqqinnerminni angallatit angissusii pillugit killilersuineq tamanna eqqumaffigisimavaat?
3. Aalisarnerup teknikkikkut iluarsartuussivigineqarnera pillugu Namminersorlutik Oqartussat nalunaarutaat nr. 72 4.novembari 2025 atuuttoq kap. 2 § 4, imm. 2 allanngortinneqassava?
4. § 18-imi saarullinnik aalisakkanillu assigisaannik qalorsuorsorluni aalisarnermi nigartalinnik T90-inik imaluunniit nigartanik kipparissunik atuinissamut malittarisassat aalajangersarneqarput. Aalajangersagaq taanna § 4-mut, ilaatigut § 4, imm. 2-mi saarullit taaneqarsimannginnerannut, atatillugu qanoq paasineqassava? Malittarisassat ima paasineqassappat angallatit 24 meterit a.t.t.-mit aamma 120 BT-mit mikinerusut sinerissap tunngaviusumillu killeqarfimmit 3 sømilit akornanni qalorsuorsorlutik saarullinniarsinnaasut?

Tunngavilersuut

Nalunaarut siusinnerusukkut atuuttoq 3 sømil iluani ungusiuniutinik imaluuniit qalorsuarnik saarullinniarneq, suluppaagarniarneq, nataarnarniarneq, qaleralinniarneq aamma qeerarniarneq angallatinut tamanut inerteqqutaasimavoq. Angallatit 24 meterit imaluuniit 120BT sinnerlugit angissusillit sinerissap qanittuani, 3 sømilip iluani aalisarsinnaanerannut killilersuutit atuussimapput.

Taamaattumik Naalakkersuisut nalunaarummik iluarsartuusinnerminni pingaaruteqarpoq siusinnerusukkut atuuttut inerteqqutaasimasut aamma killilersuutit suut allanngortinneqarsimasut ersarissumik nassuiassagaat. Pingaartumik sinerissap qanittuani angallatinik mikinerusunik aalisartut eqqarsaatigineqarnissaat pingaaruteqarpoq, malittarisassallu allanngortinneqartut taakkua inuussutissarsiutigalugu aalisarsinnaanerannut qanoq sunniuteqarsimanersut imaluunniit qanoq sunniuteqarnissaat naatsorsuutigineqarnersoq erseqqissumik saqqummiunneqartariaqarpoq.

Taamaattumik Atassummi isumaqarpugut Naalakkersuisut erseqqissumik nassuiaateqartariaqartut allannguutit suut suliarineqarsimanersut, sooq allannguutit taakku suliarineqarsimanersut, aammalu allannguutit sinerissap qanittuani inuussutissarsiutigalugu aalisartunut qanoq sunniuteqassanersut.



27. August 2026

Apeqqutit ullut suliffiusut qulit ingerlaneranni akineqarnissaat qinnutigaara.